

SA TEMPESTA

Curret su entu a passos de gigante,
faghet chentu chilometri a s'ora,
in terra ruet randine pesante
mancu 'essire si f'odet a fora.

S'abb'est fattende sa cora in sa rocca
cun su murmuttu sou e cantilena.
Si cunfundet su tronu zocca zocca
in su remor'e su riu in piena.

Ite die 'e tempesta e de disastru!
sos puzones bolende attrighinzidos
a ciulos s'imtupana in s'ozastru,
tra elighes e alinos fozidos.

Cun s'ama posta innanti, a sa basciura
armadu de acchiddu e de gabanu
s'idet Bore falende da-e s'altura,
timend'e sa tempesta s'uraganu.

Baccanzos s'idet in s'affenadorzu,
baccas passende peressi peressi
a ruilos s'iscutinan su corzu,
cand'intenden giamare "chessi-chessi".

S'idet un'imprudente cazzadore
chirchende sas istigas in su nie,
(isfidend'e su chelu su rigore),
de feras chi passadas sun'inie.

Tottu muizat, tremat 'ogni cosa,
sas fozzas ruen sutta sa tempesta;
fors'astuddidu a s'ira ispaventosa
est fina su mazzone in sa foresta.

Ispinta da' sas undas de su entu
s'abba paret lampe del'a cadinos,
da-e s'unu a s'atteru momentu
sun che cambas de mare sos trainos.

Tiu Giuanne filende trobea
de pramma lada cun sa pippa a mogsu
harat, sizendesi a sa ziminea/
" a sas robas cust'abba colat s'ossu".

Pastores e messajos tottu arreu
chi passet s'ira sun chirchende mediu:
pro lis torrare a coro ogni recreu
s'invocah'a Maria e su Rimediu.

Solitariu I°

VIAGGIU A SA LUNA?

Un'istrumentu interplanetariu
sun fatehde chi currat che saetta,
istrumentu pius che nezessariu,
ca dagh'est fattu a opera cumpletta
s'aviat da-e terra solitariu,
'olat da' pianetta in pianetta;
curret e girat a s'iscellerada
in sos astros che anima dannada .

Solitariu I°

CANTA; CANTA TURTURELLA.

Canta canta turturella
in sa dies de s'astiu,
ca dās mottu, vida e briu
a su caru messadore,
ch'in d'unu mar'e suore
t'iscultat sa 'oghe bella.

Sigas , turturella , sigas
sas notas tuas distintas,
cando a manos astrintas
in sa raglia est fadighende,
ch'a nde segare est pensende
sas beneittas ispigas.

Be su messaiu ses tue,
cando 'enit sa messera ,
consoladora; lezera,
cand'affligidu est piusu,
che li pāoes a susu
che māna da e sa nue.

Pro cussu turture bella,
si cumprendes s'arrejenu,
ti nare umil'e bonu:
"Canta, canta turturella".

Canta, non timas chi sias
importuna pro niente,
ch'a feras, buscos e zente
custu cantu no est nou.
Canta, su cantigu tou
sun suaves melodias.

In cudd'alvur'ie sa nuge
chi ch'est in fundu 'e monte
ba- e bā'... cantal'in fronte,
ch'hat de turture unu nidu,
no siet in 'ue has bidu
a prim' a primu sa lughe.

Cando pisedduzzu fia,
a una turture amada,
in sa gabbia inserrada ,
li daia pane e trigu
diciosu tempus antigu
de totta sa vida mia!